

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
18.10 सोमवार दिनांक 23.09.2024

प्रमुख समाचार –

- राजनांदगांव जिला म आकाशीय बिजली गिरे ले आठ झन के मउत।
- स्वास्थ्य मंत्री ह आज बिलासपुर म सिम्स के डीन डॉक्टर के.के.सहारे अउ एम.एस. डॉ. एस. के. नायक ल काम म लापरवाही करे बर निलंबित कर देहे।
- कबीरधाम जिला के गांव लोहारीडीह म पाछू दिन होय घटना के दंडाधिकारी जांच सुरू।

आकाशीय बिजली—मौत

राजनांदगांव अउ जांजगीर—चांपा जिला म आकाशीय बिजली गिरे के अलग—अलग घटना मन म दस लोगन के मउत होगे हे।

राजनांदगांव जिला म आकाशीय बिजली गिरे ले आठ लोगन के मउत होगे हे। खबर के मुताबिक जिला के सोमनी थाना क्षेत्र के गांव जोरातराई आज मंझनिया तिमाही परीक्षा देके छात्र मुढीपार स्कूल ले जोरातराई अउ मनगट्टा बर निकले रिहीन, तभे तेज बरसा के दौरान ए लइका मन सड़क तीर पेड़ के नीचे बने टिन के सेड खड़े होगिन, जिहां पहिली ले क्रेसर म काम करइया चार युवक मन खड़े रिहीन। तभे गरज—चमक के संग आकाशीय बिजली गिरे ले ए सबो लोगन के घटना स्थल म ही मउत होगे। एमा चार झिन स्कूली लइका अउ चार झिन पुरुष सामिल हे। उहें, एक झिन युवक घायल होय हे। सूचना मिलत पुलिस अउ प्रशासन के टीम मउका म पहुंचिन। घायल मनखे ल राजनांदगांव मेडिकल कालेज म भरती कराय गेहे।

मुख्यमंत्री विष्णुदेव साय अउ विधानसभा अध्यक्ष डॉक्टर रमन सिंह ह मृतक मनके परिजन के प्रति गहरा सोक जताय हे। मुख्यमंत्री ह मृतक मनके परिजन मन ल चार—चार लाख रुपिया के सहायता रासि देके निरदेस देहे।

उहें, जांजगीर—चांपा जिला के सुकली गांव म काली आकाशीय बिजली के चपेट म आय ले एक झिन युवक के मउत होगे हे। उहें, आठ लोगन ह झुलस गेहे। गांव म पिकनिक मनाय के दौरान ए घटना होइस। खबर के मुताबिक पानी ले बचे बर पंद्रह ले बीस युवक पेड़ तरी खड़े रिहीन, ए दौरान आकाशीय बिजली के चपेट म आके नौ लोगन झुलस गे, सबो घायल ल जिला अस्पताल म भरती कराय गीस। उहें, इलाज के दौरान एक झिन युवक के मउत होगे। उहें, आठ युवक के इलाज चलत हे। इही जिला के पचेड़ा गांव म आकाशीय

बिजली के चपेट में आय ले एक झिन माईलोगिन के मउत होंगे। बताय जात हे कि ए माईलोगिन खेत में काम करत रिहीस। ए दौरान आकाशीय बिजली गिरे ले उंखर मउत होंगे।

### स्वास्थ्य मंत्री-निरीक्षण

स्वास्थ्य मंत्री श्यामबिहारी जायसवाल ह आज बिलासपुर में सिम्स के डीन डॉक्टर के.के.सहारे अउ एम.एस. डॉ. एस. के. नायक ल काम में लापरवाही करे बर निलंबित कर देहे। स्वास्थ्य मंत्री ह अधिशासी समिति के बइठका में मरीज नम ल होवत परेसानी अउ सिम्स प्रबंधन के कार्यसैली ल लेके नाराजगी जतइन।

एखर पहिली स्वास्थ्य मंत्री ह आज बिलासपुर में सिम्स के विस्तार के रूप में कोनी में बनत मल्टी स्पेश्यालिटी हास्पिटल भवन के निरीक्षण करीन। ओमन अब तक उपलब्ध कराय गे सुविधा के अवलोकन करीन। ओमन ह इकतीस अक्टूबर तक निर्माण, खरीदी अउ भर्ती के काम पूरा करे के निरदेस दीन।

श्री जायसवाल ह अस्पताल सुरू करे के पहिली फॉयर ऑडिट अउ लिफ्ट के ऑडिट कराय के निरदेस दीन। ओमन ह तीर में ही बनत कैंसर इंस्टीट्यूट भवन के घलो जानकारी लीन अउ मार्च तक पूरा कराय के निरदेस दीन। ओमन ह बतइन कि सिम्स के नवा भवन घलो इही परिसर में बनही। राज्य सरकार डहार ले एखर बर सात सौ करोड़ रुपिया के स्वीकृति मिले हे।

### लोहारीडीह-दंडाधिकारी जांच

कबीरधाम जिला के गांव लोहारीडीह में पाछू दिन होय घटना के दंडाधिकारी जांच सुरू होंगे हे। एखर बर अतिरिक्त कलेक्टर निर्भय साहू ल दंडाधिकारी जांच अधिकारी नियुक्त करे गेहे। श्री साहू ह बतइन कि ए जांच बिंदू ले संबंधित जानकारी रखइया मनखे चौबीस सितंबर ले चार अक्टूबर तक सार्वजनिक अवकास ल छोड़ के बिहनिया ग्यारा बजे ले संझा पांच बजे तक कलेक्टर कार्यालय में उपस्थित होके लिखित या मौखिक साक्ष्य अउ अभिलेख प्रस्तुत कर सकत हे। इही बीच, साहू समाज के प्रदेस स्तरीय सोलह सदस्यीय जांच

टीम काली गांव लोहारीडीह पहुंचिस अउ मृतक के परिजन अउ पीड़ित परिवार ले भेंट करके घटना के बाद गांव के हालात के जानकारी लीन।

#### सर्वोच्च न्यायालय-पॉक्सो अधिनियम

सर्वोच्च न्यायालय ह किहीन कि लइका ले संबंधित अस्लील वीडियो देखना पॉक्सो अधिनियम के उल्लंघन हरय। शीर्ष अदालत ह देसभर के सबो अदालत ले किहीन हे कि कोनो भी न्यायिक आदेस अउ फैसला म चाइल्ड पोर्नोग्राफी शब्द के परयोग इन करय। सर्वोच्च न्यायालय ह आज ए निरदेस मद्रास उच्च न्यायालय के एक टिन फइसला ल रद्द करत दीन। ए फइसला म केहे गो रिहीस कि लइका ले जुड़े अस्लील वीडियो ल देखना पॉक्सो अधिनियम के दायरा म नइ आही। न्यायमूर्ति जे.बी.पारदीवाला के फइसला म सुझाव दे गेहे कि चाइल्ड पोर्नोग्राफी के जघा म न्यायालय बाल यौन शोषण अउ दुर्व्यवहार सामग्री-सीएसईएएम शब्द के परयोग करय। सर्वोच्च न्यायालय ह यहू किहीन कि संसद ल वैकल्पिक शब्द उपर गंभीरता ले विचार करना चाही। केंद्र सरकार पॉक्सो अधिनियम म संसोधन बर अध्यादेस ला सकथे।

#### संपूर्णता अभियान-समीक्षा बैठक

मुख्य सचिव अमिताभ जैन के अध्यक्षता म राज्य सपोर्ट मिसन अउ संपूर्णता अभियान के प्रगति के समीक्षा बइठक मंत्रालय म आयोजित करे गीस। बइठका म नीति आयोग के महानिदेसक निधि छिब्वर घलो सामिल होइन। बइठका म मुख्य सचिव ह बतइन कि संपूर्णता अभियान अउ स्टेट सपोर्ट मिसन ल लागू करे म राज्य सरकार सफल रिहीन। ओमन ह अधिकारी मन ले किहीन कि आने-आने माध्यम ले लोगन ल जागरूक करंय। ए दौरान आकांक्षी जिला के कलेक्टर मन ह संपूर्णता अभियान के जानकारी बइठका म उपस्थित अधिकारी मन ल दीन। बइठका म कुछ विभाग के अधिकारी मन ह बतइन कि डिजीटल प्लेटफार्म के उपयोग करके ओमन ह सेवा के पहुंच ल बढ़िया बनाय हे। उन्हें, कुछके मन ह समुदाय आधारित पहल के जानकारी दीन। नीति आयोग के महानिदेसक निधि छिब्वर ह अधिकारी मनले किहीन कि संपूर्णता अभियान के उद्देश्य

सरकारी योजना मन के लाभ समाज के आखिरी मनखे तक पहुंचाना हे। ओमन ह स्टेट सपोर्ट मिसन म राज्य ल मॉनितरिंग एंड इवैल्युवेशन यूनिट ले हरसंभव सहायता देबर आश्वस्त करीन।

### मौसम विभाग

एक टिन उपरी हवा के चक्रीय-चक्रवाती घेरा मध्य बंगाल के खाड़ी के उपर बने हुए हे। एखर प्रभाव ले एक टिन निम्नदाब के क्षेत्र के पश्चिम मध्य बंगाल के खाड़ी अउ उंखर तीर-तखार बने के संभावना हे। एखर असर ले प्रदेस म काली कतकोन जघा मन म हल्का ले मध्यम बरसा होय अउ गरज-चमक के संग छीटा पड़े के संभावना हे। उहें, एक-दू जघा मन म गरज-चमक के संग भारी बरसा होय अउ गाज गिरे के चेतावनी देहे। प्रदेस म भारी बरसा के क्षेत्र मुख्यतः बस्तर संभाग होही।

\*\*\*\*\*